

Սիրելի հայրենակիցներ,

21 Մայիս 2007ին բոլորեցի ներկայացուցիչի հնգամեայ պաշտօնավարութեանս առաջին տարին եւ մէկ տարուայ ընթացքին ունեցայ բաւական բեղուն ու արդիւնաւետ գործունեութիւն, հիմնական լուծում տալով կարգ մը կարեւոր հարցերու, որոնց ամփոփումը պիտի տեսնէք էջ 4ին մէջ, իսկ գրասենեակիս աշխատանքները ընթացան հեզասահ կերպով, որոնց մասին ատենին տեղեկացաք դարձեալ «Լրատու»ի միջոցով:

Խորհրդատու Մարմինի վերջին նիստի ընթացքին, օրակարգի գլխաւոր նիւթն էր Ներկայացուցիչի միամեայ գործունեութեան քննարկումը: Ժողովին ներկայ եղող անդամները, ամենայն ազատութեամբ արտայայտուելով, տուին իրենց արժեւորումը: Շնորհակալութիւն կը յայտնեմ բոլորին անհատապէս, իրենց ցուցաբերած բժախնդիր մօտեցումին եւ անկեղծ թելադրանքներուն համար: Շնորհակալութիւններս կը փափաքիմ յայտնել նաեւ բոլոր անոնց, որոնք հեռաձայնով եւ կամ անձնապէս իրենց երախտագիտութիւնը փոխանցեցին ինծի այս առիթով:

Վերջին եռամսեայի իրադարձութիւններուն ծիրէն ներս, պիտի ուզէի ցաւալի մատնանշում մը կատարել բոլորին անխտիր, ցաւ ի սրտի յիշելով Ապրիլ 24ի ոգեկոչման հանդիսութիւններու պարագան, որոնց ընթացքին ի յայտ եկաւ Կիպրահայութեան անտարբեր կեցուածքը մեր 1.5 միլիոն նահատակներուն հանդէպ: Կիպրացի քաղաքական դէմքեր եւ դեսպանութիւններ յարգանքով եւ լրջութեամբ իրենց լայն մասնակցութիւնը բերին քաղաքական ձեռնարկին, որ կազմակերպուած էր հայկական երեք կուսակցութիւններու կողմէ, մինչ հայ ներկաներու թիւը ամօթալի տոկոս կը կազմէր: Լրատուական աղբիւրները պատշաճ ձե-

ւով անդրադարձան 20-րդ դարու առաջին ցեղասպանութեան, մինչ մեր հայորդիները զլացան իրենց հանգիստէն զոհել մէկ կամ երկու ժամ, վերանորոգելու համար Յայ ժողովուրդի պահանջատիրութեան ուխտը եւ յարգելու յիշատակը մեր անմեղ զոհերուն: Աւելորդ է յիշել եկեղեցական հոգեհանգստեան արարողութեան Կիպրահայութեան մասնակցութեան փոքր թիւը, որ տարուէ տարի նուազում կ'արձանագրէ:

Եռամսեայի ամենագլխաւոր իրադարձութիւններէն մէկը կարելի է համարել Կիրակի, 6 Մայիս 2007ին, դէպի Մակարավանք ուխտագնացութեան կազմակերպումը: 33 տարիներ ետք, մեծաթիւ խումբով այս ուխտագնացութիւնը, լայնօրէն արձագանգ գտաւ ո՛չ միայն կիպրական լրատուական աղբիւրներու միջոցաւ, այլեւ Կիպրոսի բռնագրաւեալ շրջանի թրքական գլխաւոր թերթերը դրական կերպով արտայայտուեցան այս մասին:

Յունիսի մէջ, Նախարարաց Խորհուրդը, դարձեալ սեղանի վրայ դնելով կրօնական փոքրամասնութիւններու պարտադիր զինուորական ծառայութեան հարցը, որոշեց թէ 2008 թուականէն սկսեալ, 18 տարիքը ամբողջացնող բոլոր տղաքը պէտք է կատարեն իրենց զինուորական ծառայութիւնը ուսումի չմեկնած: Ինչպէս «Լրատու»ի Նախորդ թիւին մէջ նշած էինք, Խորհրդատու Մարմինի համախոհութեամբ որդեգրած էինք դրական կեցուածք ցուցաբերելու քաղաքականութիւնը, միեւնոյն ատեն Կիպրոսի Յանրապետութեան Նախագահին նամակ մը ուղղելով, անոր ուշադրութեան յանձնած էինք կարգ մը մտահոգութիւններ: Այս գծով այլ մանրամասնութիւններ կարդալ «Լրատու»ի յաջորդող էջերուն մէջ:

Ինչ կը վերաբերի Կիպրոս բնակչութիւն հաստատած մեր հայրենակիցներու կեցութեան եւ քաղաքացիութեան դիմումներուն, որոնք առկախ մնացած էին զանազան պատճառներով, ներկայ պայմաններուն տակ եւ Եւրոպական Միութեան պարտադրած օրէնքներուն համաձայն, մեր կա-

րելիությունն առաւելագոյն սահմաններէն ներս կը փորձենք լուծել անոնց հարցերը:

Գալով Քաղաքական Ապաստանեալ կարգավիճակ ունեցողներուն, շատ խիստ քայլեր առնուած են անոնց նկատմամբ: Չգալիօրէն, Ապրիլ 2007էն սկսեալ, հարցաքննութեան կանչուելով 99.9% մերժում կը ստանայ: Հայաստանէն, Վրաստանէն, Լիբանանէն, Սուրիայէն եւ այլ երկիրներէ եկած մեր հայրենակիցները, առանց այս կարգավիճակին լուրջ իմաստը հասկնալու, փաստաբաններու վճարումներ կատարելով, այս միջոցին դիմած են, երբ անկարելի եղած է իրենց կեցութեան արտօնագիրները նորոգել: Իրականութեան մէջ, անոնք Քաղաքական Ապաստանեալ չեն, այլ Կիպրոս եկած են ապաստան փնտռելու այս կամ այն պատճառներով: Քաղաքական Ապաստանեալի կարգավիճակ կը շնորհուի միայն անոնց, որոնք իրենց երկրի իշխանութիւններու կողմէ քաղաքական պատճառներով հետապնդուած են, կամ իրենց կեանքը կամ անձնական ազատութիւնը սպառնալիքի տակ կը գտնուի այդ երկրի իշխանութիւններուն կողմէ, իրենց գաղափարախօսական, կրօնական կամ այլ պատկանելիութեան լուրջ պատճառներով (տես «Լրատու» թիւ 1, էջ 9-10):

Յաջորդող էջերէն պիտի տեղեկանաք պաշտօնական հանդիպումներու, տեսակցութիւններու եւ Կիպրահայութեան հետ առնչուող աշխատանքներու մասին:

Ուրախութեամբ նաեւ կը տեղեկացնենք թէ պատրաստ է «Լրատու»ի առաջին 4 թիւերուն անգլերէն ամփոփ թարգմանութիւնը, որ կրնաք ստանալ Երեսփոխանական Գրասենեակէն եւ կամ՝ կարդալ այցելելով

<http://www.armenianmp.com> ուստայնէջ, News Bulletin
Խօսքիս աւարտին, Ձեր բոլորին կը մաղթեմ ամառուան բարի եւ հաճելի արձակուրդ:

Վարդէս Մահտեսեան
Կիպրահայ Համայնքի Պետական Ներկայացուցիչ

**Ամփոփումն առաջին տարուայ
գործունեութեան գլխաւոր իրագործումներու
եւ նախաձեռնութիւններու
01.06.2006 - 01.06.2007**

- Ամբողջական թափանցիկութիւն գործունեութեան՝ եռամսեայ «Լրատու»ի հրատարակութեամբ
- Լիաժամ անձնակազմով եւ արդիական սարքերով օժտուած երեսփոխանական գրասենեակի հաստատում
- Մակարավանք ուխտագնացութիւն, 33 տարիներ ետք
- «Արեւ» Բարեսիրական հիմնարկութեան նախաձեռնութիւն
- Լրիւ Կրթանպաստի ապահովում Մելգոնեան Կրթական Հաստատութեան նախկին աշակերտներուն
- Մելգոնեան Կրթական Հաստատութեան հողատարածքին վերապահպանում՝ Կիպրոսի Կառավարութեան կողմէ
- Երկար տարիներէ ետք, Թեմականի ընտրութիւն՝ յառաջացնելով իսկական համերաշխական ցանկ
- Այլոս Տոմէթիոս գերեզմանատան շաբաթական դրութեամբ այցելութեան արտօնութեան ապահովում
- 3 հիմնական ծրագիրներու առաջարկի ներկայացում՝ ծրագրումներու գրասենեակ (Government Planning Bureau)
- Բնակարանային ապահովման դիմումներու լուրջ աշխատանք
- Կեցութեան եւ քաղաքացիութեան հարցերու ծրագրուած աշխատանք եւ հետապնդում
- Դժուարին քաղաքացիական եւ կեցութեան հարցերու լուծում, ինչպէս բանտէ ազատ արձակում՝ կեցութեան եւ աշխատանքի արտօնութեամբ, յատուկ քաղաքական ապաստանեալի կարգավիճակի ապահովում եւ այլն
- Չանագան Կրթաթոշակներու ապահովում
- Պետական Ներկայացուցիչի կողմէ հայ շրջանաւարտներու տարեկան համախմբում եւ հիւրասիրութիւն

ԵՌԱՄՍԵԱՅ ԳՈՐԾՈՒՆԵՈՒԹԻՒՆ

Քաղաքացիական հարցեր եւ կեցութիւն

Քաղաքացիական հարցերու ամօրհանումք տարուող աշխատանքը մեր գրասենեակի գործունեութեան գլխաւոր զբաղումներէն մէկն է: Սփիւռքահայ միակ գաղութն ենք, ուր Պետական Ներկայացուցիչի գրասենեակը կը զբաղի այս հարցերով, հակառակ Եւրոպական Միութեան կողմէ սահմանուած դժուարին օրէնքներուն, որ առաջնահերթութիւնը կու տայ Եւրոպական անդամ երկիրներու քաղաքացիներուն:

Հայ Քաղաքական ապաստանեալներու կարգավիճակ ունեցողներու մեծաթիւ ներկայութիւնը Կիպրոսի մէջ, մեծ ճնշումի տակ դրած է մեր գրասենեակը: Տարիներով անորոշ մնացած այս կարգավիճակը ունեցողներուն ապագան, այս տարուայ Ապրիլ ամիսէն սկսեալ, ստացաւ տարբեր բնոյթ, որ սակայն սպասելի էր: Կիպրոսի Կառավարութեան Փախստականներու Բաժանմունքը շատ խիստ քայլերու դիմելով, հարցաքննութեան սկսած է կանչել այդ անձերը կամ ընտանիքները, մեծ մասամբ մերժելով կատարած դիմումները:

Ունեցանք Իրաքահայ անհատի մը պարագան, որ իր երկրի իշխանութիւններու կողմէ լուրջ քաղաքական հետապնդման ենթարկուելով, լքած էր իր ծննդավայրը եւ Կիպրոս մուտք գործած: Պետական Ներկայացուցիչի միջամտութեամբ ու Փախստականներու Բաժանմունքի յատուկ օրէնքի ծիրէն ներս, անոր շնորհուեցաւ աշխատանքի եւ կեցութեան արտօնագիր:

Մեր աշխատանքները ընդհանրապէս կեդրոնացած են այն անհատներու կամ ընտանիքներու կարգավիճակներուն վրայ, որոնք 5-7 տարուայ ընթացքին մեծ մասամբ Կիպրոսի Կառավարութեան Օտարահպատակներու եւ

Ներգաղթի բաժանմունքի օրենքները ամբողջացուցած են եւ ուղղութեան կամ միջնորդութեան կը կարօտին, լուծելու համար անոնց կեցութեան հարցերը:

Քաղաքացիական հարցերու պատասխանատուն մօտէն աջակցեցաւ կեցութեան արտօնութիւններ նորոգելու ապահովման եւ քաղաքացիութեան դիմումներ կատարողներու աշխատանքներուն:

Առողջապահական-բժշկական

Պրն. Մահտեսեանի դասաւորումով, ինչպէս նաեւ գաղութէն ներս գործող կարգ մը միութիւններու եւ անհատներու նիւթական օժանդակութեամբ, Լիմասուլաբնակ հայ տիկին մը, Կիպրոսէն դուրս վիրաբուժական գործողութեան ենթարկուեցաւ:

Կրթանպաստ

Անակնկալ կրթանպաստի դիմումներ ստացանք 2007 տարեշրջանի կիսուն, որ Պետական Ներկայացուցիչի միջնորդութեամբ մեծ մասամբ լուծուեցան: Հոս կը փափաքինք յիշել, թէ շատ կարելոր է կրթանպաստ ստացող աշակերտներուն բարձրագոյն սիշեր ձեռքբերելու անհրաժեշտութիւնը, որպէսզի դիւրանայ նիւթական օժանդակութիւն ապահովելու շարունակականութիւնը:

Ուխտագնացութիւն Մակարավանք

Կիրակի, 6 Մայիս 2007ին, միացեալ կազմակերպութեամբ Պետական Ներկայացուցիչի գրասենեակին եւ Ազգային Առաջնորդարանին, 33 տարիներ ետք տեղի ունեցաւ զանգուածային ուխտագնացութիւն դէպի Մակարավանք: Այս ուխտագնացութիւնը կը վայելէր Կիպրոսի Միացեալ Ազգերու Կազմակերպութեան վերահսկողութիւնը:

Այս առիթով կազմուեցաւ յատուկ յանձնախումբ մը, որ մի քանի նիստեր գումարելով, լաւագոյն կերպով ծրագրեց ու կազմակերպեց այս ուխտագնացութիւնը:

Շուրջ 300 հոգիների խումբ մը, Նիկոսիոյ Ս. Աստուածածին եկեղեցւոյ աւանդական հերիսայի օրհնութենէն ետք, ճամբայ ելաւ ուղղուելու դէպի Մակարավանք, որ կը գըտնուի Կիպրոսի բռնագրաւեալ բաժինին մէջ:

Մակարավանք ժամանելուն, քանդուած խորանին դիմաց համախմբուելով, գաղութի անդամները Վարուժան Արք.ի եւ Տէր Մովսիկ քահանայի առաջնորդութեամբ, սըրտանց աղօթեցին, յուսալով որ, օր մը, դարձեալ վերանորոգուած պիտի տեսնեն պատմական արժէք ունեցող երբեմնի այս հայկական վանքը: Չգացումները խառն էին ու տեսարանները յուզիչ: Գրեթէ կիսաւեր վիճակի մէջ գըտնուող Մակարավանքը, քանդուելու վտանգի տակ է, եթէ մօտ ապագային պէտք եղած նորոգութիւնները չկատարին, ըստ ճարտարապետ Պրն. Ճոն Կելիերեանի:

Այս պատմական այցելութեան, Կիպրական, ինչպէս նաեւ Կիպրոսի թրքական լրատուական աղբիւրները լայնօրէն անդրադարձան:

Տեղին է յիշել թէ Պոլսոյ Արքեպիսկոպոս Մեսրոպ Մութաֆեան կապ հաստատելով Պրն. Մահտեսեանին հետ, փափաք յայտնած էր իր մասնակցութիւնը բերելու այս ուխտագնացութեան, սակայն կամքէ անկախ պատճառներով չկարողացաւ ներկայանալ:

Ուխտագնացները ոգեւորուած առաջարկեցին, որ յաջորդ տարի աւանդական հերիսայի պատրաստութիւնն ու օրհնութիւնը կատարուի Մակարավանքի շրջափակէն ներս:

Այս ուխտագնացութեան միակ խաչածելումը, նոյն օրը Յայկական Բարեգործական Ընդհանուր Միութեան Նիկոսիոյ տիկնանց օժանդակ մարմինին հերիսայի կազմակերպումն էր: Երկու ամիս առաջ յայտարարուած այս ձեռնարկը կազմակերպողները կը ձգտէին համերաշխութեան եւ միասնականութեան ոգին արթնցնել Կիպրահայ գաղութէն ներս՝ հասարակաց տօներու եւ կամ առիթներու նկատմամբ: Մակարավանքը բոլորիս ժառանգութիւնն է եւ կա-

րելի չէ հերքել այս իրականությունը անտեղի խաչաձեւումներով:

Մելգոնեան Կրթական Հաստատություն

Երկուշաբթի, 11 Յունիսին Պրն. Մահտեսեանի գլխաւորած պատուիրակութիւնը հանդիպում մը ունեցաւ Ընդհանուր դատախազ Պրն. Պետրոս Զլիրիտիսին հետ, քննելու Մելգոնեան Կրթական Հաստատութեան ապագային առնուելիք նորագոյն քայլերը, որու ընթացքին փոխանցուեցաւ թէ Ընդհանուր Դատախազը Կրթական Նախարարութենէն տեղեակ պահուած էր թէ, Հայկական Բարեգործական Ընդհանուր Միութեան հաւանութեամբ, Մելգոնեան Կրթական Հաստատութեան շէնքերը մէկ կամ երկու տարւայ համար անվճար պիտի տրամադրուին Ալլանճայի կըրթարանին: Հետեւաբար, հարցի անմիջական հետապնդումը անհնար պիտի ըլլար այս ժամանակամիջոցին:

Տեղին է յիշել, թէ Հայ Համայնքի Պետական Ներկայացուցիչը, վերոյիշեալ կարգադրութեան մասին, նախօրօք տեղեակ պահուած էր բարեացակամ եւ թափանցիկ ձեւով աշխատող Կիպրոսի Կառավարութեան կողմէ եւ յայտնած էր իր համամտութիւնը Մելգոնեան Կրթական Հաստատութեան շէնքերը անվճար տրամադրելու գաղափարին առնչութեամբ, որպէս փոխադարձ եւ օրինակելի ժեստ պետութեան կողմէ Կիպրահայ գաղութին ընծայուած օժանդակութիւններուն:

Թելադրելի պիտի ըլլար, որ այս դասաւորումը պատասխանատու անհատներու կողմէ, ըլլար բացայայտ եւ թափանցիկ, յարգելով ո՛չ միայն Կիպրահայ Պետական Ներկայացուցիչին պաշտօնն ու հանգամանքը, այլեւ Կիպրահայ գաղութը տեղեակ պահուէր այս ընթացքին մասին: Մութ գործելակերպով եւ պայման դնելով՝ յետագայի ակընկալութեամբ, որ Պրն. Զլիրիտիս ետ քաշուի հարցին հետ առնչուելու իր պատրաստակամութենէն, անգամ մը եւս կը փաստուին Հայկական Բարեգործական Ընդհանուր Միու-

թեան յետին նպատակները, որոնք պատճառ դարձան Մելգոնեան Կրթական Հաստատութեան փակումին եւ ապագայի ոչ հայանպաստ ծրագիրներուն:

Պարտադիր զինուորական ծառայութիւն

Չորեքշաբթի, 20 Յունիս 2007ին Նախարարաց Խորհուրդը, անգամ մը եւս քննելով, վաւերացուց փոքրամասնութիւններու պարտադիր զինուորական ծառայութեան մասնակցութիւնը:

Յետայսու, 2008 թուականէն սկսեալ, 1 Յունուար 1990էն ետք ծնած տղաքը, որոնք ամբողջացուցած են իրենց երկրորդական ուսումը, պարտաւոր են կատարելու ազգային բանակի ծառայութիւնը:

Իսկ 16 տարիքը ամբողջացնող տղաքը, ճամբորդութեան ժամանակ պէտք է ներկայացնեն երկրէն դուրս ելլելու արտօնագիր, որ կը տրուի Պաշտպանութեան Նախարարութեան գրասենեակէն:

Յանձնախումբեր

Երիտասարդական Յանձնախումբի կազմակերպած հաւաքը տեղի ունեցաւ Չորեքշաբթի, 11 Ապրիլ 2007ին «Իւթիւճեան» սրահին մէջ, ներկայութեամբ 40 երիտասարդ-երիտասարդուհիներու: Հաւաքի ընթացքին ներկաները արտայայտուեցան երիտասարդութիւնը յուզող հարցերու մասին եւ առաջարկներ յայտնեցին զանոնք քով քովի բերելու մասին:

Կիպրոս-Հայաստան Յանձնախումբը Ուրբաթ, 18 Մայիս 2007ին ժողով մը գումարեց, ուր առաջարկուեցաւ նախ կապ հաստատել Կիպրոս գտնուող մեր հայաստանցի հայրենակիցներուն հետ եւ փորձել անոնց միջոցաւ սերտացնել Կիպրոս-Հայաստան փոխ-յարաբերութիւնները, տարբեր մարզերու մէջ:

Երեքշաբթի, 29 Մայիս 2007ին, Մշակութային Յանձնախումբը հանդիպում մը ունեցաւ ներկայութեամբ Տիկ.

Ժաննա Թահմիզեանի, ուր արժարժուեցաւ Հայաստանէն բարձրորակ խումբեր հրաւիրելու կարելիութիւնը, ելոյթներ ունենալու համար Կիպրոսի մէջ, ինչպէս նաեւ քաջալերել տեղական ուժերով մշակութային ձեռնարկներ կազմակերպելու հնարաւորութիւնը:

Չորեքշաբթի, 30 Մայիս 2007ին Խորհրդատու Մարմինը գումարեց իր 3-րդ նիստը, քննարկելու Պետական Ներկայացուցիչի միամեայ գործունեութիւնը:

Շնորհաւորական գիրեր

«Ազդակ» օրաթերթի 80-ամեակին առիթով, 21 Մայիս 2007 թուակիր նամակով, Պետական Ներկայացուցիչը շնորհաւորագիր մը ուղղեց թերթի խմբագիր տնօրէն Պրն. Շահան Գանտահարեանին, գնահատելով անցեալի ու ներկայի խմբագիրներուն եւ աշխատակազմին նուիրումը:

23 Մայիս 2007 թուակիր նամակով, Պրն. Սահտեսեան շնորհաւորագիր մը ուղղեց Պրն. Խրիստոտուլոս Փաշարտիսին, Պաշտպանութեան Նախարար Նշանակուելուն առիթով, նորանոր յաջողութիւններ մաղթելով:

23 Մայիս 2007 թուակիր նամակով մը, Պետական Ներկայացուցիչը շնորհաւորեց Պրն. Ճորճ Տեր Բարթողը Կիպրացի լրագրողներու շարքին գնահատանքի արժանանալուն գծով, որպէս երկար տարիներու վաստակ ունեցող հայազգի լրագրող:

11 Յունիս 2007 թուակիր նամակներով, Պրն. Սահտեսեան անհատապէս շնորհաւորեց Պրն. Յովիկ Նասանեանն ու Պրն. Դանիէլ Չորպաճեանը, «Esther» երաժշտախառն ներկայացումին յաջողութեան ի նպաստ իրենց բերած ներդրումին համար, իբրեւ հայազգի հմուտ արտադրիչներ:

Նշանակումներ

Տիկին Խրիսուլլա (Ոսկի) Չորպաճեան, 19 Յունիս 2007ին անդամ նշանակուեցաւ Կրթական Նախարարութեան եւ Եունեսքոյի համագործակցութեամբ մշակութային

արժեքներու վերապահպանման յանձնախումբին:

Կրթական Նախարարութենէն ստացուած 28 Յունիս 2007 թուակիր նամակը վաւերացուց Պրն. Մահտեսեանի կողմէ առաջարկուած Պրն. Սեպուի Դաւիթեանին նշանակումը, որպէս Նարեկ Հայկական Վարժարաններու Հոգաբարձական Մարմինի անդամ: Պրն. Սեպուի Դաւիթեան փոխարինեց կազմէն վերջերս հրաժարած Պրն. Արամ Դաւիթեանը:

Թեմական ընտրութիւններ

Երկար տարիներու յետաձգումէն ետք, Կիրակի, 26 Մայիս 2007ին տեղի ունեցան թեմական ընտրութիւնները, համերաշխութեան ցանկի մը շուրջ համաձայնելով:

Այս ընտրութիւններու գծով կարգ մը ազգայիններու կողմէ կատարուած աշխատանքը, գլխաւորութեամբ Վարուժան Արքեպիսկոպոսի եւ օժանդակութեամբ Պետական Ներկայացուցիչի, բարձր գնահատելի էր: Արդիւնքին գծով եղան կարգ մը թիրիմացութիւններ, որոնք լուծուեցան բարուք կերպով: Փափաքելի է որ այս նոր կազմը ձեռք ձեռքի տալով գործէ, ի շահ մեր եկեղեցական եւ գաղութի բարօրութեան:

Պետական-պաշտօնական մակարդակի հանդիպումներ

Երկուշաբթի, 2 Ապրիլին, Պետական Ներկայացուցիչը հանդիպեցաւ Եւրոպական Միութեան Խորհրդրդատու Մարմինի Փոքրամասնութիւններու Ազգային Դիմագիծի Պահպանութեան յատուկ յանձնաժողովի պատուիրակութեան հետ, ուր ան ներկայացուց Կիպրահայ համայնքը յուզող կարգ մը հարցեր, շեշտելով հանդերձ Կիպրոսի բարեխնամ կառավարութեան ցուցաբերած մօտեցումը: Այս մէկը յանձնաժողովի 2-րդ այցն էր Կիպրոս:

Նոյն օրը, Երկուշաբթի, 2 Ապրիլ 2007ին Պրն. Մահտեսեան հանդիպում մը ունեցաւ Կիպրոսի Արդարադատութեան Նախարար Պրն. Սոֆոքլիս Սոֆոքլեուսին հետ, ան-

հատի մը հարցին կապակցութեամբ:

Ուրբաթ, 13 Ապրիլ 2007ին Պրն. Մահտեսեան ժողով մը ունեցաւ Կիպրոսի Համալսարանի տնօրէն Դոկտ. Անտրէաս Խրիստոֆիտիսի եւ աշակերտական հարցերու տնօրէն-պատասխանատու Պրն. Ֆիլիպպոս Բանտուրասի հետ:

Երեքշաբթի, 17 Ապրիլ 2007ին Պետական Ներկայացուցիչը հանդիպում մը ունեցաւ Կրթական Նախարարութեան Միջին Կրթութեանց պատասխանատուներ Պրն. Տիոնիսիոսի եւ Պրն. Բիթրովիլիտիսի հետ: Ան առաջարկեց Կիպրական երկրորդական եւ օտար վարժարաններ յաճախող հայ աշակերտներուն տրամադրուած կրօնքի դասապահերը լաւագոյնս օգտագործելու նպատակով, զանոնք փոխարինել հայ լեզուի եւ հայոց պատմութեան ուսուցումով, նկատի ունենալով որ մեր եկեղեցին արդէն իսկ շաբաթական դրութեամբ կրօնքի դասաւանդութեան պարտականութիւնը յանձն առած է: Այս առաջարկը 30 Մայիս 2007 թուակիր նամակով յղուեցաւ Կրթական Նախարարութեան Միջին Կրթութեանց տնօրէնուհի Տիկ. Չինա Պուլիին, նշելով նաեւ արդիական դասագիրքերու պատրաստութեանց կարիքը:

Երեքշաբթի, 8 Մայիս 2007ին Պետական Ներկայացուցիչը հանդիպում մը ունեցաւ Կրթական Նախարար Պրն. Աքիս Զլէանթուսին հետ, Կիպրահայ գաղութի կրթական հարցերու առնչութեամբ:

Հինգշաբթի, 10 Մայիս 2007ին Պրն. Մահտեսեան տեսակցութիւն մը ունեցաւ Ներքին Գործոց Նախարարութեան Ընդհանուր Տնօրէն Դոկտ. Լազարոս Սաւիտիսին հետ, կարգ մը հարցերու կապակցութեամբ:

Չորեքշաբթի, 23 Մայիս 2007ին Պետական Ներկայացուցիչը հանդիպում մը ունեցաւ Խորհրդարանի Նախագահ Պրն. Տիմիթրիս Խրիստոֆիասի հետ, ներկայութեամբ Հայաստանի Լրագրողներու Միութեան նախագահուհի Տիկ. Աստղիկ Գեորգեանի եւ «Ազգ» օրաթերթի խմբագիր Պրն. Յակոբ Աւետիքեանի:



Արիս Բլեանթունի հետ



Էլենի Մալրուի հետ

Երեքշաբթի, 29 Մայիս 2007ին Պրն. Մահտեսեան տեսակցութիւն մը ունեցաւ Նիկոսիոյ քաղաքապետ Տիկ. Էլենի Մալրուի հետ, Նիկոսիոյ հին գերեզմանատան հարցին, ինչպէս նաեւ 18-26 Օգոստոսին Հայաստանի մէջ կայանա-

լիք Համահայկական Դ. մարզախաղերուն գծով, Նիկոսիան ներկայացնող մարզիկներու խումբին օժանդակութիւն ապահովելու համար:

Հինգշաբթի, 31 Մայիս 2007ին Պետական Ներկայացուցիչը իր գրասենեակին մէջ ընդունեց Կիպրոսի մէջ Միացեալ Նահանգներու նոր նշանակուած քաղաքական հարցերու պատասխանատու Տիկ. Էյմի Տահմը: Այս այցելութեան հիմնական նիւթն էր 2006 թուականի միջազգային կրօնական ազատութեան տեղեկագիրը, որու ծիրէն ներս անդրադարձ եղաւ Մակարավանք ուխտագնացութեան, ինչպէս նաեւ լայն գիծերու մէջ ան ծանօթացաւ Կիպրահայ գաղութի ներկայի ու անցեալի իրավիճակին:

Ուրբաթ, 1 Յունիս 2007ին Պրն. Մահտեսեան եւ Կիպրոսի միւս փոքրամասնութիւններու ներկայացուցիչները հանդիպում մը ունեցան նոր նշանակուած պաշտպանութեան նախարար Պրն. Խրիստոտուլոս Փաշարտիսին հետ, ուր անոնց փոխանցուեցաւ փոքրամասնութիւններու պարտադիր զինուորական ծառայութեան մասնակցութիւնը, 2008 թուականէն սկսեալ:

Երկուշաբթի, 11 Յունիս 2007ին Կիպրահայ ազգայիններէ բաղկացած յանձնախումբը, գլխաւորութեամբ Պետական Ներկայացուցիչին, տեսակցութիւն մը ունեցաւ Ընդհանուր Դատախազ Պրն. Պետրոս Զլիրիտիսին հետ, քննելու համար Մելգոնեան Կրթական Հաստատութեան ներկայ եւ ապագայի զարգացումները:

Ուրբաթ, 15 Յունիս 2007ին Պրն. Վարդգէս Մահտեսեան հրաւիրուեցաւ Իտալիոյ դեսպանատուն, տեսակցութիւն մը ունենալու համար Դեսպան Պրն. Լուիճի Նաբոլիթանոյի հետ, ուր ան Պետական Ներկայացուցիչին յանձնեց Ս. Ղազար վանքին մէջ գտնուող 14-րդ դարու «Պատմութիւն Մակեդոնիոյ Ալեքսանդրին» հայերէն բնագիր մատենանի (manuscript) օրինակը: Իր կարգին Պրն. Մահտեսեան այս մեծածաւալ տպագրութիւնը յանձնեց Ազգային Առաջնորդարան:

Ձեռնարկներու ներկայութիւն

Ուրբաթ, 13 Ապրիլ 2007ին Պրն. Մահտեսեան հրաւիրեցաւ ներկայ գտնուելու Եւրոպական Միութեան Կիպրոսի Կեդրոնի բացումին, ուր խօսք առաւ Կիպրոսի Հանրապետութեան Նախագահ Պրն. Տասոս Փափատոփուլոս:

Կիրակի, 22 Ապրիլ 2007ին Տէր Եւ Տիկին Մահտեսեաներ ներկայ գտնուեցան Համազգայինի «Օշական» մասնաճիւղի «Սիփան» պարախումբի տարեկան ելոյթին:

Չորեքշաբթի, 25 Ապրիլ 2007ին Տէր Եւ Տիկին Մահտեսեաներ ներկայ գտնուեցան Հայկական Ցեղասպանութեան 92-րդ ոգեկոչման քաղաքական ձեռնարկին, որ տեղի ունեցաւ Cyprus International Conference Centre-ին մէջ, կազմակերպութեամբ հայկական երեք կուսակցութիւններու: Օրուան բանախօսն էր Յունաստանէն յատկապէս հրաւիրուած նախկին խորհրդարանի նախագահ Պրն. Աբոստոլոս Զաքլամանիս, որմէ ետք խօսք առաւ Պրն. Մահտեսեան, մատնանշելով օրըստօրէ Հայկական Ցեղասպանութեան ճանաչման ի նպաստ միջազգային գետնի վրայ արձանագրուող զարգացումները: Ան մասնաւորաբար նշեց թէ Հրանդ Տիկի անարգ սպանութիւնը չի կրնար կասեցնել Հայ ժողովուրդի արդարութիւն պահանջող աշխատանքները շարունակելու սուրբ պայքարը:

Հինգշաբթի, 26 Ապրիլ 2007ին Կիպրոսի Խորհրդարանը մէկ վայրկեան յոտնկայս լռութեամբ յարգեց 1915-ի Ցեղասպանութեան զոհերու յիշատակը, որմէ ետք խօսք առաւ Պետական ներկայացուցիչը:

Ուրբաթ, 27 Ապրիլ 2007ին Տէր Եւ տիկին Վարդգէս Մահտեսեան ներկայ գտնուեցան «Իւթիւճեան» սրահին մէջ տեղի ունեցած Կիպրոսի Հայ Աւետարանական Եկեղեցւոյ կազմակերպած դասախօսութեան, որու նիւթն էր «Հայկազեան Համալսարանի դերը սփիւռքի հայապահպանման մարտահրաւերներուն դէմ»:

Շաբաթ, 28 Ապրիլ 2007ին Տէր Եւ Տիկին Մահտեսեաներ ներկայ գտնուեցան Հ.Ե.Մ. - Հ.Ս.Ը.Մ.ի կազմակերպած

խրախճանք-ճաշին, որ կազմակերպուած էր մասնաւորաբար որպէս միջ-գաղութային մարզական խաղերու եզրափակիչ ձեռնարկ:

Կիրակի, 29 Ապրիլ 2007ին Պետական Ներկայացուցիչը եւ տիկինը ներկայ գտնուեցան Փասիտիի սրահին մէջ տեղի ունեցած Հայ Յեղափոխական Դաշնակցութեան 117-ամեակի ձեռնարկին:

Նոյն օրը, 29 Ապրիլին Տէր եւ Տիկին Մահտեսեաններ ներկայ գտնուեցան Հայ Աւետարանական Եկեղեցւոյ Ապրիլեան Եղեռնի ոգեկոյման պաշտամունքին, ուր, խօսք առնելով, Պետական Ներկայացուցիչը շեշտեց միասնականութեան անհրաժեշտութիւնը մեր գոյատեւման պայքարի ընթացքին:

Ուրբաթ, 11 Մայիս 2007ին Տէր եւ Տիկին Վարդգէս Մահտեսեաններ ներկայ գտնուեցան Սոցիալ Դեմոկրատ Հնչակեան Կուսակցութեան եւ Նոր Սերունդ Մշակութային Միութեան ակումբի բացման արարողութեան: Պետական Ներկայացուցիչը խօսք առնելով, մաղթեց բեղմնաւոր գործունեութիւն, ինչպէս նաեւ՝ ձգտիլ նոր սերունդին մօտ ազգային ու հայրենասիրական գիտակցութիւնը զարգացնելու:

Չորեքշաբթի, 16 Մայիս 2007ին Տէր եւ Տիկին Մահտեսեաններ ներկայ էին Նարեկ Վարժարաններու մարզահանդեսին, քաջալերելու մարզասէր դպրոցականները:

Չորեքշաբթի, 23 Մայիս 2007ին Cleopatra պանդոկին մէջ տեղի ունեցած «Կանաչներու» կուսակցութեան վեցամեայ գործունեութեան ներկայացումին, այլ պաշտօնական այրերու կողքին, ներկայ գտնուեցաւ նաեւ Հայ Պետական Ներկայացուցիչը:

Կիրակի, 27 Մայիս 2007ին Տէր եւ Տիկին Մահտեսեաններ ներկայ գտնուեցան Համազգայինի Կիպրոսի «Օշական» Մասնաճիւղի «Դիմակ» թատերախումբի ներկայացումին, Փասիտիի սրահին մէջ:

Շաբաթ, 9 Յունիս 2007ին Տէր եւ Տիկին Մահտեսեաններ ներկայ գտնուեցան «Esther» երաժշտախառն ներկայա-

ցումին, որ տեղի ունեցավ Curium-ի մեջ: Պետական Ներկայացուցիչին հպարտութիւն ներշնչած էին երկու հայ արտադրիչներուն, ինչպէս նաեւ մեծ թիւով հայ դերակատարներուն եւ երգչախումբի անդամներուն մասնակցութիւնը այս բարձրորակ ելոյթին:

Չորեքշաբթի, 13 Յունիս 2007ին Պետական Ներկայացուցիչն ու տիկինը ներկայ գտնուեցան Լառնազայի Նարեկ Վարժարանի հանդէսին, որ նուիրուած էր քառասնամեայ վաստակ ունեցող եւ հանգստեան կոչուող ուսուցչուհի Օրդ. Թալիա Փափանտոնիուին:

Կիրակի, 17 Յունիս 2007ին Նիկոսիոյ American Academy-էն Մելգոնեանցի վերջին շրջանաւարտներու փափաքին ընդառաջելով, Պրն. Մահտեսեան ներկայ գըտնուեցաւ աւարտական դասարանին յարգանքի տուրք մատուցելու արարողութեան, որ տեղի ունեցաւ Մելգոնեան Եղբայրներու դամբարանին առջեւ, գետեղելով ծաղկեփունջ մը:

Չորեքշաբթի, 20 Յունիս 2007ին Տէր եւ Տիկին Վարդգէս Մահտեսեան ներկայ գտնուեցան Նարեկ Յայկական Վարժարաններու ամավերջի հանդէսին, ուր Պետական Ներկայացուցիչը եւ Կաթողիկոսական Փոխանորդը յաջորդաբար կատարեցին վկայականներու բաշխում: Հանդէսէն ետք, Տէր եւ Տիկին Մահտեսեաններ ներկայ գտնուեցան նաեւ Նիկոսիոյ Ծնողաց Միութեան կազմակերպած հիւրասիրութեան, ի պատիւ շրջանաւարտներուն եւ հանգստեան կոչուող վաստակաշատ ուսուցչուհի Տիկին Ալիս Դաւիթեանին:

Երեքշաբթի, 26 Յունիս 2007ին Տէր եւ Տիկին Վարդգէս Մահտեսեան ներկայ գտնուեցան Լառնաքայի «Angelic Voices» երգչախումբի բացառիկ յաջող ելոյթին, որուն մաս կը կազմէին նաեւ հայ պատանիներ: Խումբին ղեկավար եւ արհեստավարժ Սոփրանօ Տիկին Սիլվա Մաքամեան արժանացաւ ներկաներու գնահատանքին, ի մասնաւորի՝ Պրն. Մահտեսեանի:

Ղարաբաղի որբերու այցելություն

Ղարաբաղեն ժամանած որբերու առաջին խումբը Կիպրոս ժամանեց Չորեքշաբթի, 13 Յունիս 2007ին: Պետական Ներկայացուցիչի գրասենեակը անմիջապես տեղեակ պահեց Յ.Ե.Մ.-ի, Յ.Բ.Ը.Մ.-ի եւ Ս.Դ.Յ.Կ.-ի ակումբները պատշաճ ձեւով հիւրընկալելու համար այս խումբը: Յաջորդաբար, Կիրակի, 17 եւ Երկուշաբթի, 18 Յունիսի երեկոյեան Յ.Ե.Մ.-ն ու յարակից միութիւնները, ինչպէս նաեւ Ս.Դ.Յ.Կ.-ը, յանձն առին հիւրասիրել գանոնք, իսկ Պրն. Մահտեսեանի կարգադրութեամբ, 17 Յունիսին անոնք այցելեցին Պարալիմնիի Ocean Aquarium-ը, ապա՝ Ս. Աստուածածին եկեղեցի, Ազգային Առաջնորդարան ու Նարեկ Վարժարան:



Ընդունելություններ

Ուրբաթ, 18 Մայիս 2007ի երեկոյեան ՏԵՐ եւ Տիկին Մահտեսեաններ իրենց բնակարանին մէջ հիւրընկալեցին Յայաստանի Լրագրողներու Միութեան Նախագահուհի Տիկ. Աստղիկ Գեորգեանը եւ «Ազգ» օրաթերթի խմբագիր Պրն. Յակոբ Աւետիքեանը, ներկայութեամբ Կիպրահայ մամուլի պատասխանատուներուն եւ խմբագրապետներուն:

Ինչպես 2006 կրթական տարեշրջանի վերջաւորութեան, այս տարի եւս, Չորեքշաբթի, 27 Յունիս 2007ին Պրն. Մահտեսեան իր բնակարանին մէջ հիւրասիրեց 2007 թուականի բոլոր հայ շրջանաւարտները եւ Նարեկ Յայկական Վարժարաններու տնօրէնութիւնն ու ուսուցչական կազմը: Այս հիւրասիրութեան ներկայ էր նաեւ Կաթողիկոսական Փոխանորդ Տ. Վարուժան Արքեպիսկոպոս Յերկելեան եւ քահանայ հայրերը:

Եռօրեայ այցելութիւն Յայաստան

Յայաստանի Հանրապետութեան Արդարադատութեան Նախարարի պաշտօնական հրաւերով, Արդարադատութեան Նախարար Պրն. Սոֆորլիս Սոֆորլեուս, ընկերակցութեամբ Պրն. Մահտեսեանի, Յինգշաբթի, 28 Յունիս 2007ին մեկնեցաւ Յայաստան:



Ձախեն աջ.-
 Կոնստանդինոս Յաճիրաւլու, Սոֆորլիս Սոֆորլեուս,
 Յայկ Յարութիւնեան, Վարդգես Մահտեսեան
 եւ Վահրամ Կաժոյեան

Եռօրեայ այցելութեան ընթացքին, Պրն. Սոֆոքլէուս եւ Պետական Ներկայացուցիչ արդիւնաւետ հանդիպումներ ունեցան Հայաստանի Արդարադատութեան Նախարար Պրն. Գեորգ Դանիէլեանին, ՀՀ Ոստիկանութեան Պետ Պրն. Հայկ Յարութիւնեանին եւ ՀՀ Ընդհանուր Դատախազ Պրն. Յովսէփեանին հետ: Հանդիպումներէն ետք, Նախարար Սոֆոքլէուս ուղղուեցաւ դէպի Ծիծեռնակաբերդ, ուր ծաղկեպսակ մը գետեղեց 1915-ի Ապրիլեան Եղեռնի զոհերու յուշարձանին առջեւ:

Կիպրոս վերադարձին, Հայ Երեսփոխանական Գրասենեակը հաղորդագրութիւն մը յղեց Կիպրական լրատուական աղբիւրներուն, ուր տեղ գտան վերոյիշեալ հանդիպումները եւ Ծիծեռնակաբերդ այցը, նշելով թէ Պրն. Սոֆոքլէուս, կիսատ թողելով իր շրջապտոյտը, Կիպրոս վերադարձաւ Շաբաթ, 30 Յունիս 2007ին, Թրոտոս շրջանի անտառներու հրդեհին պատճառով:

«Ծանօթանանք Կիպրոսի Հանրապետութեան օրէնքներուն» բաժինը լոյս պիտի տեսնէ «Լրատու»ի յաջորդ թիւին մէջ:

ԿԻՊՐԱՀԱՅ ՀԱՄԱՅՆՔԻ ՊԵՏԱԿԱՆ ՆԵՐԿԱՅԱՑՈՒՑԻՉԻ ԳՐԱՍԵՆԵԱԿ

Քաղաքական Գրասենեակ

9B & C Kastorias Street, Ayia Paraskevi, 2002 Strovolos

Հեռախօս 22- 45 45 40, Հեռատիպ 22- 42 46 42

Ել. Հասցէ office@armenianmp.com

Ոստայնէջ՝ <http://www.armenianmp.com>

Խորհրդարանական Գրասենեակ

Office Δ-2-2, House of Representatives, 1402 Nicosia

Հեռախօս 22- 40 72 02, Հեռատիպ 22- 40 74 42

Ել. Հասցէ vmahdessian@parliament.cy